

**Orange Day message by Hon Desheila Bastienne on behalf of Women's Parliamentary Caucus.**

Mr Speaker, les mwan komanse par dir mersi Caucus Madanm pou donn mwan sa loportinite sa lannen pou pas sa mesaz ozordi a lokazyon komansman sa 16 zour ki lemonn i dedye pou komemor sa lalit kont vyolans domestik.

Sa lokazyon ki ganny marke par kouler oranz, ki nou apel *Orange Days* e ki demar ozordi 25 Novanm e i ale ziska le 10 Desanm. I mark lazournen Dwa Imen.

Sa lannen, sa lokazyon pe deroul anba tenm '*Orange the World: Generation Equality Stands against Rape*' tenm swazir par Nasyon Ini. E isi Sesel sa letap pe deroul anba tenm '*Ini pou en lafen avek vyolans kont bann madanm ek zenn fiy*'.

Orizinalman dapre Nasyon Ini, *Orange day* i sipoze ganny selebre tou le, le 25 sak mwan. I plito en kanpanny ki Nasyon Ini li menm ti komanse an 2008 anba tenm '*Annou ini pou aret vyolans kont madanm ek zenn fiy*'. Sa zour nou pe dir non a okenn form vyolans kont madanm e zenn fiy san oubliy bann msye osi.

Statistik i montre ki bokou madanm ek zenn fiy pe sibir vyolans dan lavi toulezour. Statistik resan i montre nou severite sa sitasyon isi sesel.

Oktob 2021, 83 madanm ek 16 zonm ti raport vyolans domestik ant fanm ek zonm. E 55 madanm ek 22 msye ti raport vyolans familyal lo en nivo pli larz ki enkli zanfan e lezot manm fanmir, ki fer en total 176 zis pou mwan Oktob lannen pase. ki sif pli o ki ti ganny anrezistre. E zis pou premye kar 2022, i annan 184 ka ki'n ganny raporte.

Mon oule fer resorti ki devan Tribinal Lafanmir depi Me 2021, ziska Me 2022, in annan 734 ka ki'n ganny *Protective Order*, e ladan 48 ka vyolans seksyel, ki devan Lakour Mazistra zis 17 ka ki'n fini. Lezot ka i ankor *pending*. Sa i montre severite sa

sityasyon e nesesite bann Lalwa pou protez nou popilasyon kont vyolans.

Vyolans i kapab vin dan diferan form. Fizik, seksyel, emosyonnel e konmela menm atraver media sosyal.

Sesel, nou reste angaze e koman en Gouvernman responsab nou pou kontinyen ranforsi bann Lalwa ek Polisi ki an plas pou adres sa size vyolans domestik parske pli gran vyolasyon drwa imen, se vyolans dan nenport ki laform.

Sa sityasyon i afekte madanm ek zenn fiy diferan laz, lorizin e osi lo nenport ki nivo dan sosyete. I enportan ki nou ankouraz bann viktim pou briz sa silans otour nenport form vyolans ki zot sibir. Fodre ki nou realize ki vyolans napa plas dan nou lavi e ki i pa sipoze vin par nou lavi kot nou dir ki sa i zis en pti ka, naryen pa ok otour okenn sityasyon vyolans.

Fodre pa ki nou fer li vin en *taboo* dan nou kiltir, fodre pa ki nou onte pou dil avek bann tel sityasyon e pou kasyet deryer bann leskiz tel ki ou stati dan lasosyete, ki fanmir ou sorti ladan e menm ki travay ki ou pe fer. Sa bann tel leskiz pa pou fer ou dibyen e la ou pou fini par detri ou prop lavi .

Letan ou swazir pou viv dan linyorans e ou pa oule koze, ou kapab vin en viktim depresyon, maladi mantal ou swa menm fini par swiside.

Bokou nou, ler nou vwar bokou aksyon vyolans ki pe arive oubyen nou pe menm eksperyans sa bann labi, nou prefere pa fer nanryen e ni koz lo la pou diferan rezon. Nou kanmi, nou onte lo ki dimoun pou dir. Non, nou bezwen leve e denons nou bann abizer ozordi menm akoz demen i kapab tro tar. Nou bezwen double nou zefor ansanm avek lezot partner pou edik dimoun lo vyolans ek son lefe.

I enportan ki nou tou nou konnen kote pou ale letan nou vwar nou pe komans vin viktim sa fleo. Fodre ki nou vin konsyan ki nou lavi i presye, ki nou bezwen prezerv li a tou moman

e fodre ki nou aksepté ki le moman en dimoun i komans abiz nou e mank respe pou nou, i kriy avek ou an servan bann term vilger. E de ki i lev son lanmen e i menas ou, ou bezwen pran konsyans pou aret li avan i eskale, akòz i kapab kout ou, ou lavi.

Pa esper demen, leve ozordi e al rod led. Anou aret li o pli vit posib. Nou sosyete napa plas pou bann abizer, e i pe depan lo nou bann madanm e zenn fiy, ki for, dinamik, an bonn sante e ranpli avek zwa de viv pou ede dan sa lalit.

Ansanm annou ini pou met en lafen avek vyolans kont madanm ek nou bann zenn fiy. Annou fer sa premye pa ozordi e pa les person briz nou lavenir.

Avek sa de mot, mon remersye ou Mr Speaker.